

## **PANDUAN BAGI MENIMBANGKAN KELAYAKAN CALON-CALON UNTUK KURNIAAN DARJAH KEBESARAN, BINTANG DAN PINGAT NEGERI**

### **1 DARJAH YANG AMAT MULIA BINTANG SARAWAK**

#### **(A) Panglima Negara Bintang Sarawak (P.N.B.S.)**

Dianugerahkan kepada mereka yang mempunyai kedudukan yang tinggi lagi ternama dan telah menyumbangkan khidmat cemerlang kepada Negeri Sarawak dalam satu tempoh yang agak lama. Pengaruh mereka hendaklah kuat serta memberi kesan dalam apa jua lapangan dan dilakukan untuk kebaikan Negeri.

Penyandang lelaki di gelar "DATO SRI" dan isterinya "DATIN SRI" sementara penyandang wanita digelar "DATO SRI". Tidak ada gelaran untuk suami penerima.

#### **(C) Panglima Setia Bintang Sarawak (P.S.B.S.)**

Darjah ini dianugerahkan kepada mereka yang mempunyai khidmat cemerlang dan jasa terhadap Negeri Sarawak dalam pelbagai lapangan. Untuk mendapat anugerah ini, seseorang itu mestilah mempunyai pencapaian cemerlang dari segi ekonomi, sosial, politik, teknologi dan seterusnya melakukan perubahan yang unggul untuk kemajuan Negeri Sarawak.

Pangkat ini boleh dianugerahkan kepada lelaki dan wanita. Penyandang lelaki digelar sebagai 'Dato' dan isterinya 'Datin' sementara penyandang wanita digelar 'Dato'. Tiada gelaran untuk suami penerima.

#### **(D) Johan Bintang Sarawak (J.B.S.)**

Dianugerahkan kepada mereka yang tinggi taraf kedudukannya dan telah membuat jasa cemerlang kepada Negeri Sarawak yang walaupun tidak sebagai mana jasa yang membolehkan mereka dipertimbangkan untuk pangkat pertama. Hendaklah mempunyai mempunyai pengaruh yang kuat dalam apa jua lapangan dan dilakukan untuk kebaikan Negeri.

Kakitangan awam hendaklah dalam Kumpulan Pengurusan Tertinggi dalam Gred Utama "C" atau Gred Khas "C" dan ke atas (atau yang setaraf) sahaja layak dipertimbangkan.

**(E) Pegawai Bintang Sarawak (P.B.S.)**

Dikhaskan sebagai satu anugerah kepada mereka yang tinggi taraf kedudukannya dalam perkhidmatan kepada Negeri Sarawak meskipun tidak setinggi taraf yang diperlukan untuk pangkat kedua, tetapi boleh dianggap sebagai istimewa, seperti satu tugas khas yang sukar dan dilakukan dengan jayanya atau tanggungjawab berat dan telah dilakukan dengan cemerlang selama beberapa tahun.

lanya sesuai untuk dianugerahkan kepada pegawai dalam Kumpulan Pengurusan dan Profesional dalam Kategori III dan keatas, termasuk Penolong Pesuruhjaya Polis, Kolonel (Tentera Darat), Group Captain (Pasukan Udara) dan Captain (Laut).

**(F) Ahli Bintang Sarawak (A.B.S)**

Untuk khidmat dan jasa yang banyak dan cemerlang.

Untuk Kumpulan Pengurusan dan Profesional dalam Kategori IV termasuk Penolong Penguasa Polis, Mejar (Tentera Darat), Ketua Skudron (Pasukan Udara) dan Leftenen Komander (Tentera Laut).

**(G) Bentara Bintang Sarawak (B.B.S.)**

Dianugerahkan sebagai menghargai jasa cemerlang mereka yang kurang sedikit taraf kedudukannya daripada mereka yang layak menerima pangkat keempat.

Untuk Kumpulan Sokongan, Kategori V dan VI merangkumi Inspektor Kanan Polis, Kapten (Tentera Darat), Flight Lieutenant (Pasukan Udara) dan Leftenan (Tentera Laut).

**2. DARJAH UTAMA YANG AMAT MULIA BINTANG KENYALANG SARAWAK**

**(A) Panglima Gemilang Bintang Kenyalang (P.G.B.K)**

Dikhaskan kepada mereka yang telah menyumbangkan khidmat cemerlang kepada Negeri Sarawak dalam satu tempoh yang agak lama dan mempunyai pengaruh yang kuat serta tanggungjawab yang paling tinggi sesuai dengan taraf mereka.

Penyandang lelaki di gelar "DATUK" dan isterinya "DATIN" sementara penyandang wanita juga digelar "DATUK". Tidak ada gelaran untuk suami penerima.

**(B) Johan Bintang Kenyalang (J.B.K.)**

Mereka yang tinggi taraf kedudukannya dan membuat jasa cemerlang kepada Negeri Sarawak dalam semua pekerjaan. Untuk melayakkan diri, mereka mestilah mempunyai pengaruh yang kuat dalam lapangan kegiatan dan yang mana telah dilakukan dengan berkesan demi kebaikan.

Untuk Gred Utama "C" atau Gred Khas "C" dan ke atas dalam Kumpulan Pengurusan Tertinggi (atau yang setaraf)

**(C) Pegawai Bintang Kenyalang (P.B.K.)**

Satu anugerah kepada mereka yang tinggi taraf kedudukannya dalam perkhidmatan kepada Negeri Sarawak yang mana meskipun tidak setinggi taraf yang diperlukan untuk pangkat kedua, tetapi boleh dianggap sebagai istimewa, seperti satu tugas khas dan dilakukan dengan jayanya atau tanggungjawab berat dan telah dilakukan dengan cemerlang selama beberapa tahun.

Untuk Kumpulan Pengurusan dan Profesional dalam Kategori III dan ke atas termasuk Penolong Pesuruhjaya Polis, Kolonel (Tentera Darat), Group Captain (Pasukan Udara) dan Captain (Laut).

**(D) Ahli Bintang Kenyalang (A.B.K.)**

Untuk khidmat dan jasa yang paling tinggi sesuai dengan taraf mereka.

Untuk Kumpulan Pengurusan dan Profesional dalam Kategori IV termasuk Penolong Penguasa Polis, Mejar (Tentera Darat), Ketua Skuadron (Pasukan Udara) dan Leftenan Komander.

**3. Darjah Jasa Bakti Sarawak (D.J.B.S)**

Pangkat pertama bagi Jasa Bakti Sarawak ini dianugerahkan kepada mana-mana pegawai dalam Perkhidmatan Awam ataupun dalam perkhidmatan Badan-Badan Berkanun yang telah melakukan tugas dengan terpuji dan memberikan perkhidmatan yang cemerlang kepada Negeri Sarawak.

Penyandang lelaki digelar "DATU" dan isterinya "DATIN" sementara penyandang wanita digelar "DATIN PADUKA". Tidak ada gelaran untuk suami penerima.

#### 4. PINGAT PENTADBIRAN AWAM

Dikhaskan kepada para pegawai awam dan pekerja Badan-Badan Berkanun untuk mengiktiraf dan menghargai khidmat cemerlang, kecekapan, kebolehan dan kejayaan mereka. Ada tiga pangkat, iaitu:-

- (a) Pingat Perkhidmatan Cemerlang (Emas)
- (b) Pingat Perkhidmatan Bakti (Perak)
- (c) Pingat Perkhidmatan Terpuji (Gangsa)

Dikhaskan kepada pegawai-pegawai yang berkhidmat dengan gigih dan cemerlang di dalam bidang pekerjaan mereka dan mereka pula tidak layak untuk dicalonkan menerima apa juga Darjah dan Bintang Kebesaran yang dinyatakan di atas atau kenaikan pangkat di dalam perkhidmatan atas sebab-sebab tertentu di dalam perjawatan.

#### 5. PINGAT KEBERANIAN

Pingat ini adalah diberikan kepada lelaki ataupun wanita, sama ada berkhidmat atau ditugaskan di dalam Pasukan-Pasukan Angkatan Bersenjata Malaysia dan Polis Di Raja Malaysia yang telah melakukan tugas-tugas yang berani dan gagah di Negeri Sarawak.

#### 6. PINGAT JASA KEBERANIAN

Diberikan kepada lelaki ataupun wanita **selain** daripada anggota-anggota Pasukan Angkatan Bersenjata Malaysia dan Pasukan Polis Di Raja Malaysia, yang telah menunjukkan keberanian. Misalnya, menyelamatkan nyawa, mencegah jenayah atau menangkap musuh yang mengancam keselamatan awam dalam keadaan-keadaan yang merbahaya di Negeri Sarawak.